

Kalaallit Nunaanni Pinerluuteqarsimasunik Qitiusumik Nalunaarsuiffimmi inunnik paasissutissanik suliarinnittarneq pillugu nalunaarut.

§ 32, imm. 5 naapertorlugu, aamma § 72 inunnik paasissutissanik suliarinnittarneq pillugu inatsit nr. 429 31. maj 2000-imeersoq, § 32 imm. 4-tut Kalaallit Nunaanni atuutilersoq, aamma § 67 nalunaarut nr. 1238 14. oktober 2006-imeersoq naapertorlugu, aalajangersarneqarpoq:

Kapitali 1

Taaguut siunertarlu il.il

§ 1. Pinerluuteqarsimasunik Qitiusumik Nalunaarsuiffik aalajangiinernik immikkoortoqarlunilu pinerluttoqarsimaneranik paasiniaanernik immikkoortoqarpoq.

Imm. 2. Rigspolitii qarasaasiatigut paasissutissanut akisussaasutut oqartussaavoq.

§ 2. Nalunaarsuisarfiup siunertarivaa:

- 1) pinerluttulerinermi sulianik aalajangiinerit il.il. nalunaarsorneqarnissaat, pinerluttulerinermi eqqartuussivitsigut suliaqarnermi atugassatut,
- 2) politiit iluminni sulinermi atatillugu nalunaarsuiffittut atornissaa,
- 3) pillagaasimanermut pillagaasimannginnermulluunniit uppenarsaatnik takussutissiiinerni tunngavittut, aamma eqqartuussiveqarnikkut sulialinnut atorneqartussanik allanik nalunaaruteqarnermi, inunnit nalinginnaasunit atorneqartussatut oqartussaqaarfinnilu allani atugassatut,
- 4) pinerluuteqarsimanermut kisitsisitigut paasissutissanik suliaqarnermi tunngavittut, aamma
- 5) danskisut innuttaassuseqalernissamik qinnuteqaammut naliliinissamut tunngavittut.

Kapitali 2

Imarisai, nalunaaruteqarneq aamma paasissutissanik peersineq

§ 3. Aalajangiinernut immikkoortumi inuit pinerluttulerinermi suliani aalajangiiffigineqartut pillugit paasissutissat ilanngunneqassapput, tassunga ilanngullugu sakkutooqarnikkut eqqartuusseriaatsit atorlugit pinerluttulerinermi suliat.

Imm. 2. Paasissutissat suussusii ilanngussaq 1-mi takuneqarsinnaapput.

§ 4. Pinerluttoqarsimaneranik paasiniaanermut immikkoortumi paasissutissat politiinut pingaarutillit ilanngunneqassapput.

Imm. 2. Paasissutissat suussusii ilanngussaq 2-mi takuneqarsinnaapput.

§ 5. Kriminalregisterimut paasissutissanik nalunaarutiginninneq eqqartuussivinnit, auditorinit, Direktoratet for Kriminalforsorgenimit, Kalaallit Nunaanni Pinerluttunik Isumaginnittoqarfimmit, pinerluttunik isumaginnittoqarfiup ataani isertitsivinnit, politiinit, unnerluussisussaatitaasunit aamma nunani allani politiinit imaluunniit inatsiseqarnikkut oqartussaasunit pissaaq.

§ 6. Oqartussaqaarfiup nalunaarutiginnittup Rigspolitiilluunniit paasissutissat eqqunngitsumik suliarineqannginnissaat imaluunniit sallusumik nalunaarutigineqannginnissaat imaluunniit politiinit suliaasatut isikkoqarnerisut nakkutiginnissaat qulakkiissavaat. Paasissutissat eqqunngitsuusutut imaluunniit salloqittaataasutut, imaluunniit politiinut soqutiginaateqanngitsutut paasineqarpata piaarnerpaamik iluarsineqassapput imaluunniit peerneqassapput.

§ 7. Paasissutissanik nutaanik Pinerluuteqarsimasunik Nalunaarsuiffimmut nalunaarutiginnittoqartillugu siusinnerusukkut nalunaarutiginninnerit nalunaarsorneqarsimasut nutarterneqassapput.

§ 8. Aalajangiisarfirmi ilanngussaq 3-mi malittarisassatut aalajangersakkat malillugit paasissutissanik peersineq pissaaq.

§ 9. Pinerluttoqarsimaneranik paasiniaasarfirmi ilanngussaq 4-mi malittarisassatut aalajangersakkat malillugit paasissutissanik peersineq pissaaq.

§ 10. Inuk nalunaarsorneqarsimasoq pillugu pineqartup toqukkut qimagutereernerata kingorna kingusinnerpaamik ukiut marluk qaangiunnerini paasissutissat Pinerluuteqarsimasunik Nalunaarsuiffimmit peerneqassapput. Rigspolitiit aatsaat kingusinnerusukkut toqusoqarsimaneranik nalunaarfigineqarsimappata piffissami tamatumani pineqartoq pillugu paasissutissaatigineqartut peerneqassapput.

Kapitali 3

Inuit nalunaarsorneqarsimasut imminnut pillutik paasissutissanik takunnissinnaanerit

§ 11. Politiit pillagaasimanermut pillagaasimannginnermulluunniit uppernassaammik, pineqartoq tamatuminnga kissaateqarpat, inunnut ataasiakkaanut tunniussissapput. Inunnut 18-it inorlugit ukiulinnut pillagaasimannginnermut pillagaasimanermulluunniit uppernarsaat aatsaat tunniunneqassaaq pineqartumut angajoqqaatut oqartussaasut imaluunniit angajoqqaatut akisussaatitaasut akuersinerisigut.

Imm. 2. Imm. 1 naapertorlugu pillagaasimanermik allagartani aalajangiussat aalajangiussatut nalunaarsorneqarsimasut kisiisa ilanngunneqarsinnaapput, aamma pinerluttulerinermut inatsit, ikiaroorntoq pillugu inatsit unioqputinneqarsimappat imaluunniit nunani allani aalajangiussat unioqputinneqarsimappata tullittunilu taaneqartunik killilikkat:

- 1) Unnerluussissummik taamaatitsinerup eqqartussivimmit akuerineqarneranit ulluliussamit ukiut marluk ingerlareersimappata unnerluussissummik taamaatitsineq ilanngunneqassanngilaq.
- 2) Inaarutaasumik aalajangiinnermi ulluliussamit ukiut marluk ingerlareersimappata akiliisitsinissamik aalajangiinnerit ilanngunneqassanngillat.

- 3) Aalajangiinerit allat ilanngunneqassanngillat inaarutaasumik aalajangiinermi ulluliussamit ukiut pingasut ingerlareersimappata. Aalajangiinermi pineqartoq pineqaatissinneqarsimasunut inissiisarfimmiissimappat aalajangiineq ilanngunneqassaaq iperagaanerup pineranit ukiut tallimat ingerlareersimannippata.
- 4) Pinerluttulerinermi inatsimmi §§ 156-158 aamma 161 naapertorlugu pineqaatissiinerit ilanngunneqassanngillat, pineqaatissiinerup inaarutaasumik atorunnaarsinneqarnerata pineranit ukiut tallimat ingerlareersimappata.

Imm. 3. Inuusuttunit 15-it 18-inillu akornanni ukiulinnit unioqqutitsinerit pineqarpata akiliisitsinissamik aalajangiinerit ilanngunneqassanngillat, pineqartoq pinerluttulerinermi inatsisip ilaanik unioqqutitsinikkut siullerpaamik aalajangiiffigineqarpat, aamma aalajangiinermi ulluliunneqartumit ukioq ataaseq ingerlareersimappat.

Imm. 4. Imm. 2-mi aamma 3-mi taaneqartut ilanngunneqassanngillat pinerluttulerinermi aalajangersagaq pineqartoq kingusinnerusukkut atorunnaarsinneqarsimappat.

Imm. 5. Nalunaarsorneqarsimasumit qinnuteqareernikkut pisuni immikkut ittuni imm. 2-mi aamma 3-mi piffissaliussanit taaneqartunit tunngatillugu immikkut akuersissummik Rigspolitiit nalunaaruteqarsinnaapput.

§ 11 a. Aalajangiineq inummit 15-init 18-inillu akornanni ukiulimmut unioqqutitsisumut tunngasoq, taannalu § 11 naapertorlugu siornatigut pineqaatissinneqareersimanngitsoq, § 11-imi malittarisassat malillugit pineqaatissinneqarnermik allagartami taamaallaat ilanngunneqarsinnaavoq pineqartoq aalajangiinerup nalaaniit ukiut pingasut qaangiutsinnagit utimut pinerluuteqarsimappat, tassani unioqqutitsissut § 11-mi malittarisassanik pineqaatissinneqarnermik allagartamut ilanngunneqarsinnaasunik ilaqarsimappat.

Imm. 2. Imm. 1-mi aalajangersagaq atuutitinneqassanngilaq aalajangiinermi siullermi pinerluttulerinermut inatsimmi § 152 (pinerluttunut inuusuttunut pineqaatissiissutit immikkut ittut) naapertorlugu, pinerluttulerinermi inatsimmi §§ 156-158 aamma 161 naapertorlugit imaluunniit pinerluuteqarsimasunut inissiisarfimmiittussanngortitsinermik pineqaatissiineq aalajangiunneqarsimappat.

§ 12. Pillagaasimanermut pillagaasimannginermulluunniit uppersaammik § 11 naapertorlugu qinnuteqarneq politiinut saqqummiunneqassaaq.

Imm. 2. Paasissutissanik tunniussineq taamaallaat pisinnaavoq, pineqartoq pissusissamisootumik kinaassutiminik uppersaareerpat, imaluunniit allatut iliorluni qulakkeerneqareerpat uppersaammik qinnuteqartoq ilumut taannaasoq paasissutissanut attuumassutilik. Qinnuteqaat qinnuteqartumit namminermit atsiorneqarsimassaaq. Qinnuteqaat allamit, pineqartuunngitsumit, saqqummiunneqarpat politiit qulakkiissavaat taanna pineqartoq sinnerlugu iliuuseqarnissaminut pisinnaatitaanersoq.

§ 13. Pinerluttoqarsimaneranik misissuinermit paasissutissanik taamaallaat tunniussisoqarsinnaavoq kapitali 7-imi malittarisassat malillugit.

§ 14. §§ 11 aamma 13-i malillugit politiit paasissutissanik nalunaaruteqarnissamik aalajangererat Datatilsynimut nalunaarutigineqarsinnaavoq. Tilsynip aalajangiinera allaffissornikkut oqartussanut allanut nalunaarutigineqarsinnaanngilaq.

Kapitali 4

Paasissutissanik inunnut ataasiakkaanut il.il ingerlatitseqqinneq

§ 15. Pinerluuteqarsimasunik Nalunaarsuiffimmit paasissutissat, kapitali 3-mi, 5-imi aamma 7-mi malittarisassat pinnagit, inunnut ataasiakkaanut imaluunniit suliffeqarfinnut il.il ingerlateqqinneqassanngillat, tamatumani §§ 16-i imaluunniit 17-i aatsaat malinneqarpata, imaluunniit paasissutissanik ingerlateqqissinnaaneq inatsinik imaluunniit malittarisassanik aalajangersakkanut naapertuuttunik pinngippat.

§ 16. Aalajangiinermut immikkoortumit paasissutissat ingerlateqqinneqarsinnaapput paasissutissani pineqartoq akuersisimappat.

Imm. 2. Akuersineq allakkatigut nalunaarutigineqassaaq, paasissutissanillu makkuninnga imaqassalluni,

- 1) paasissutissat qanoq ittut ingerlateqqinneqarsinnaanersut,
- 2) paasissutissat kikkunnut ingerlateqqinneqarsinnaanersut, aamma
- 3) paasissutissat tiguisussamit taaneqartumit qanoq atorneqarsinnaanersut.

Imm. 3. Akuersineq kingusinnerpaamik ukiup ataatsip ingerlareernerani atorunnaassaaq.

Imm. 4. Aalajangersagaq una malillugu paasissutissanik ingerlatitseqqinneq taamaallaat paasissutissanik § 11-mi taaneqartunik ilaqarsinnaavoq.

§ 17. Politiit qinnuteqarfigineqarneq naapertorlugu Pinerluuteqarsimasunik Nalunaarsuiffimmi paasissutissanik ataasiakkaanik inunnut ataasiakkaanut imaluunniit suliffeqarfinnut ingerlatitseqqissinnaapput, ingerlatitseqqinneq inuit ataasiakkaat imaluunniit pisortat soqutigisaannik erseqqilluinnartumik qajassuunneqartussanik isertuunneqartussatut tunngavilinnik isumaginninnissaq siunertaqarpata, tassunga ilanngullugu paasissutissani pineqartup qajassuunneqarnissaa, imaluunniit ingerlatitseqqinneq inuup imaluunniit suliffeqarfiup pisortanut tunngatillugu suliaqarnerata naammassineqarnissaanut pisariaqartinneqarpata.

Kapitali 5

Ilisimatusarnermut atugassatut paasissutissanik ingerlatitseqqinneq

§ 18. Rigspolitiit paasissutissanik Pinerluuteqarsimasunik Nalunaarsuiffimmeersunik ingerlatitseqqissinnaapput, malittarisassat erseqqinnerusut malillugit, ingerlatitseqqinneq ilisimatusarnerup imaluunniit kisitsisitigut misissuinerup inuiaqatigiinnut pingaarutillip naammassineqarnissaanut tamanna pisariaqartinneqarpata.

Kapitel 6

Pisortat oqartussaasuinut paasissutissanik ingerlatitseqqinneq

§ 19. Paasissutissat, inunnut aalajangersimasunut atatinneqarsinnaasut, kapitali 5-imi aamma 7-imi malittarisassat saniatigut, pisortani oqartussaqaarfimmut allamut ingerlateqqinneqassanngillat, tamanna kapitalimi matumani aalajangersakkani aatsaat ilaappat, imaluunniit paasissutissanik ingerlatitseqqinnissaq inatsimmik tunngaveqarpata, imaluunniit inatsimmik aalajangersakkamilluunniit tunngaveqarluni pippat.

§ 20. Paasissutissat aalajangiinermik immikkoortumeersut ingerlateqqinneqarsinnaapput,

paasissutissani pineqartoq akuersisimappat. § 16, imm. 2 aamma 3 taamatuttaaq atorneqassapput.
Stk. 2. Aalajangersagaq taanna malillugu paasissutissanik ingerlatitseqqittoqarsinnaavoq
paasissutissanik § 11-mi taaneqartunik aatsaat peqarpat.

§ 21. Rigspolitiit piumaffigineqarneq naapertorlugu Pinerluuteqarsimasunik Nalunaarsuiffimmit
aamma pillagaasimanermut uppernarsaatinik, § 22-mi taaneqartutut, tamakkiisunik
tunniussisinnaapput, ukununga

- 1) politiit, unnerluussisussaataasut, Justitsministeria, Direktoratet for Kriminalforsorgen aamma
Kalaallit Nunaanni Pinerluttunik Isumaginnittoqarfik kiisalu Forsvarets Auditørkorps,
- 2) Domstolsstyrelse,
- 3) Udlændingestyrelse,
- 4) Kalaallit Nunaanni Pinerluttunik Isumaginnittoqarfiup ataani isertitsiviit, inunnut isertitsivimmi
sulilerniarlutik qinnuteqartunut tunngatillugu,
- 5) Eqqartuussiveqarfiit, inunnut eqqartuussiveqarfimmi sulilerniarlutik qinnuteqartunut
tunngatillugu,
- 6) Kalaallit Nunaanni Eqqartuussiviit, inunnut eqqartuussisooqataasussatut
siunnersuutigineqartunut tunngatillugu,
- 7) Folketingip ombudsmandia,
- 8) Inatsisartut Ombudsmandiat,
- 9) nunani avannarlerni oqartussaqaarfik attuumassuteqartoq, sulianut naalagaaffimmi innuttaasutut
pisinnaatitaanissamik pissarsiniarnerni, aamma sulianut biilinut kørekortimik pissarsiniarnernut
tunngasuniut,
- 10) nunani allani politiit, nunani avannarlernerni imaluunniit nunanut Europarådimut ilaasortaasuni
unnerluussisussaataasut eqqartuussiviillu, nunani allani pisortatigoortumik pinerluttulerinermi
sulianut atugassat,
- 11) nunani allani politiit, unnerluussisussaataasut aamma eqqartuussiviit nunani nr.10-mi
ilaatinneqanngitsut, nunani allani pisortatigoortumik pinerluttulerinermi sulianut atugassanik,
suliani ataasiakkaani nangaanartoqannginnera nalilerneqarpat.

Stk. 2. Imm. 1, nr. 4, 5-i aamma 9 malillugit paasissutissanik ingerlatitseqqinneq taamaallaat
pisinnaavoq paasissutissani pineqartup akuersineratigut. § 16, imm. 2 aamma 3, taamatuttaaq
atorneqassapput.

§ 22. Rigspolitiit qinnuvigineqarneq naapertorlugu taamatuttaaq pillagaasimanermik
uppernarsaammik pisortatigoortumik atugassamik tunniussisinnaapput, ilanngussami 1-imi
taaneqartunik aalajangiinernik imalimmik, ukununga

- 1) pisortani oqartussanut, pinerluttulerinermi inatsimmi § 164-i imaluunniit inatsisit
aalajangersakkaniluunniit allat naapertorlugit ilumut qinnuteqartoq tunineqarsinnaanersoq
uppernarsarlugu oqartussaqaarfiup pineqartup suleriaasiata iluanni immikkut
tunniussisoqarsinnaanera akuersissuteqartoqarsinnaaneraluunniit apeqqutaatillugu,
- 2) Udenrigsministeriamut, danskisut innuttaassusilinnut ikiuinissamut, nunani allani
pinerluttulerinermi suliatigut malersorneqartunut atugassamik,
- 3) Kalaallit Nunaanni Isumaginninnermi Maalaaruteqartarfik aamma kommunit, meeqqanut
inuusuttunullu ikiuinissamik inatsisartut peqqussutaat aamma inunnut annertuumik
innarluutilinnut inatsisartut peqqussutaat naapertorlugu meeqqanut inuusuttunullu immikkut
ittumik ikiorneqarnissamik aallaritsisoqarnissaanik pisariaqartitsisut angajoqqaavinut,
- 4) Kalaallit Nunaanni Isumaginninnermi Maalaaruteqartarfik, kommunet aamma Ilaqutariinnut,
Naligiissitaanermut, Isumaginninnermut aamma Inatsisinik atortitsinermut
Naalakkersuisoqarfik, inunnut ulloq unnuarlu meeqqanik paaqqutarinninnissamik, nammineq

- angerlarsimaffimmi akissarsiaqarluni paarsisarnissamik qinnuteqartunut, kiisalu taakku aappaannut, inooqataannut aamma allanut meeqqanik paarsinermi ikiuuttussanut,
- 5) Rigsombudsmandimut, inunnut meeravissartaarnissamik kissaateqartunut, kiisalu meeqqanut meeravissiannngortinneqartussatut kissaatigineqartut angajoqqaavinut,
 - 6) Ilaqutariinnut, Naligiissitaanermut, Isumaginninnermut aamma Inatsisinik atortitsinermut Naalakkersuisoqarfik, kommunit aamma suliffeqarfiit pisortani ingerlatsinerup ataaniittut, inunnut meeqqanut inuussuttunullu ulluunerani, ulloq unnuarlu aamma siunnersorneqarnissamik neqeroorutini atorfininnissaminnik qinnuteqartunut, kiisalu taakku aappaannut, inooqataannut aamma allanut meeqqanik paarsinermi ikiuuttussanut,
 - 7) Ilaqutariinnut, Naligiissitaanermut, Isumaginninnermut aamma Inatsisinik atortitsinermut Naalakkersuisoqarfik aamma kommunit, inunnut ulluunerani neqeroorutinit aamma inersimasunut ineqarfinni atorfininnissamik qinnuteqartunut, kiisalu inunnut ineqarfinnik namminersortunit ingerlanneqartuni sulisunut imaluunniit namminneq ineqarfinnik ingerlatsisunut,
 - 8) kommunet, inunnut meeqqat inuussuttullu ikiorneqarnissaannik inatsisartut peqqussutaat aamma inunnut annertuumik innarluutilinnut inatsisartut peqqussutaat naapertorlugit ingiaqataasussanut, aalajangersimasumik attaveqataasussanut imaluunniit tapersersortasussanut,
 - 9) kommunet, inunnut siunnersuinikkut siunnersorteqarnikkullu tapersersortitit kiisalu piginnaangorsaaqqinnermik suliaqarnermi atorfininnissamik qinnuteqartunut,
 - 10) Peqqissutsimut Naalakkersuisoqarfik, inunnut tarnimikkut nappaatilinnut sullissivinni atorfininnissamik qinnuteqartunut,
 - 11) Ilaqutariinnermut, Naligiissitaanermut, Isumaginninnermut aamma Inatsisinik atortitsinermut Naalakkersuisoqarfik aamma kommunalbestyrelset, inunnut meeqqat atuarfiini atorfininnissamik qinnuteqartunut, aamma atorfeqarnerminnut atatillugu toqqaannartumik atuartunut attaveqartunut,
 - 12) Kalaallit Nunaanni Aningaasaqarnermut- aamma Sulisoqarnermut Aqutsisoqarfik aamma Kalaallit Nunaanni Aalisarnermut Akuersissutinik Nakkutilliisoqarfik, inunnut Kalaallit Nunaanni Aalisarnermut Akuersissutinik Nakkutilliisoqarfimmi atorfininnissamik qinnuteqartunut,
 - 13) Inatsisartut aamma Qinigaasinnaanermut ataatsimiititaliaq inunnut inatsisartunut qinigaasimasunut, kommunalbestyrelsenut, nunaqarfinni aqutsisunut, ilagiit sinniisaannut aamma ataatsimiititaliarsuarnut, isumalioqatigiissitanut siunnersuisooqatigiinnullu, tassani ilaasortaaneq kommunalbestyrelsemut qinigaasinnaanermik piumasaqaatitaqarfiuvoq, kiisalu inunnut taaneqartunut sinniisussat,
 - 14) Issittumi Sakkutooqarfik (Arktisk Kommando) aamma Illersornissaqarfiup Sulisoqarnermut Aqutsisoqarfia, inunnut illersornissaqarfimmi atorfininnissamik qinnuteqartunut imaluunniit sakkutuunut naalakkatut toqqarneqartussanut,
 - 15) Kommunini inunnut annaassiniartarnerni upalungaarsimaartartunut atorfininnissamik qinnuteqartunut, kiisalu sakkutuunut naalaganngorusuttunut, immikkullu pisimasoqartillugu sakkutuut naalagaat angerlartinneqarsimasut,
 - 16) Naalakkersuisut, inunnut Kalaallit Nunaanni nakorsaanertut atorfininnissamik qinnuteqartunut,
 - 17) Ilinniartitaanermut, Kulturimut, Ilisimatusarnermut aamma Ilageeqarnermut Naalakkersuisoqarfik, inunnut katersugaasivinni katersugaateqarfinnilu atorfininnissamik qinnuteqartunut,

Imm. 2. Aalajangiineq, inummut 15-it 18-inillu akornanni ukiulimmut, ilanngussaq 1-imi ilanngunneqartut naapertorlugit siornatigut aalajangiiffigineqarsimannngitsumut, aatsaallu

ilanngunneqarsinnaasoq pillagaasimanermut uppernarsaat imm. 1 tunngavigalugu, pineqartoq aalajangiinerup pineraniit ukiut pingasut iluini pinerluuteqaqqissimappat ilanngunneqassaaq, pillagaasimanermut uppernarsaammi imm. 1 naapertorlugu ilanngunneqartussamik.

Imm. 3. Imm. 2-mi aalajangersagaq atorneqassanngilaq, aalajangiinermi siullermi pinerluttulerinermi inatsimmi § 152-i (inuusuttunut pinerluttunut pineqaatissiissutit immikkut ittut) naapertorlugu iliuuserisamut kinguneqartitsisoqarnissaanik pineqaatissiisoqarsimappat, pinerluttulerinermi inatsimmi §§ 156-158 naapertorlugit pineqaatissiisoqarsimappat, imaluunniit pinerluuteqarsimasunut inissiisarfimmiittussanngortitsisoqarsimappat.

Imm. 4. Imm. 1, nr. 1, 4-12 aamma 16-17 naapertorlugu paasissutissanik ingerlatitseqqinneq taamaallaat pisinnaavoq paasissutissani pineqartumit akuerineqarnikkut. § 16, imm. 2 aamma 3 taamatuttaaq atuutissapput.

§ 22 a. Rigspolitiit qinnuteqarfigineqarneq malillugu politiinut aamma unnerluussisussaataasunut pillagaasimannginnermut pillagaasimanermulluunniit uppernarsaammik immikkut ittumik tunniussissapput, pinerluttulerinermi inatsit naapertorlugu eqqartuussivimmi atorneqartussamik, ilanngussaq 1-mi taaneqartunik aalajangiinernik, akiliisitsinissamik aalajangiinernik pinerluttoqarsimaneranik paasiniaanermut immikkoortumeersunik ikiaroorartulerinermik inatsimmik unioqquitsinernut tunngasunik imalimmik.

§ 23. Politiit inuit nunamut iseqqusaanngitsut pillugit paasissutissanik Kriminalresterimeersunik Udlændingestyrelsemut nalunaaruteqarsinnaapput, visummimik aamma najugaqarnissamik akuersissummik qinnuteqaatinik suliaqarnermut atugassanik.

Imm. 2. Imm. 1 malillugu paasissutissat Udlændingestyrelsemit Udenrigsministeriap visummimik tunniussisarnermut sinniisuutitaanut ingerlateqqinneqarsinnaapput, tassunga ilanngullugu nunani isumaqatigiissutit avataaniittuni sinniisuutitanut, visummimik qinnuteqaatinik suliaqarnermut atugassatut.

Imm. 3. Paasissutissat imm. 1-i aamma 2 malillugit ingerlateqqinneqarsinnaasut tassaapput inuit nunamut iseqqusaanngitsutut nalunaarfigineqarsimasut kinaassusersinissaannut paasissutissat, nunamut iseqqusaannginnerup sivisussusia aamma oqartussaarfik sorleq nunamut iseqqusinnginnermik nalunaaruteqarsimansoq pillugit paasissutissat.

§ 24. Rigspolitiit paasissutissanik ataasiakkaanik Pinerluuteqarsimasnik Nalunaarsuiffimmit ingerlatitseqqissinnaapput, suliani isumannaallisaanikkut akuerisassat suliarineqarnerannut, kiisalu suliani isumannaallisaanikkut assingusumik pisariaqartitsiffiusuni suliaqarnermut atatillugu, takuuk tassunga ilanngullugu Statsministeriap nunani NATOmut imaluunniit EUmudt ilaasortani ataatsimoorluni soqutigisaqarfiusuni paasissutissanik isumannaatsuutitsinissaq pillugu illersuinissaq pillugu kaajallaasitaa, pasissutissat immikkoortitikkat allat kiisalu paasissutissat isumannaatsuutitsinissaq pillugu illersugaanissaannik soqutigisat allat.

§ 25. Politiit naalagaaffimmi innuttaasutut pisinnaatitaaffeqarnermik sulianut Pinerluuteqarsimasunik Nalunaarsuiffimmit takussutissiamik tamakkiisumik ilanngussissapput.

§ 26. Rigspolitiit qinnuteqarfigineqarneq malillugu meeravissartaarnermi akuersissutinik sulianut aalajangiinermut immikkoortumit takussutissiamik ilanngussissapput, aamma aalajangersakkani ilanngussaq 4, imm. 2.1-imi aamma 2.2-mi taaneqartunik unioqquitsinermut tunngatillugu eqqartuussivitsigut malersooqitassat pillugit paasissutissanik pinerluttoqarneranik paasiniaanerup immikkoortuaneersunik paasissutissanik tunniussisinnaallutik.

Imm. 2. Imm. 1 malillugu paasissutissanik ingerlatitseqqinneq taamaallaat pisinnaavoq paasissutissani pineqartup akuersineratigut. § 16, imm. 2 aamma 3 taamatuttaaq atuutissapput.

§ 27. Rigspolitiit qinnuteqarfigineqarneq malillugu Pinerluuteqarsimasunik Nalunaarsuiffimmit takussutissiamik tamakkiisumik Erhvervsstyrelsemut saqqummiussisinnaapput, ukiumoortumik naatsorsuutitut inatsimmi § 135, imm. 6 naapertorlugu aqutsisoqarfiup suliassaminik isumaginninnissaanut atugassamik.

§ 28. Rigspolitiit qinnuteqarfigineqarneq malillugu Trafikstyrelsemut tunniussissapput, sulianut timmisartorsinnaanermut akuersissutinik tunniussinermut aamma pigisaqarnermut atatillugu suliaqarnermut atugassamik, paasissutissanik pinerluttulerinermi inatsit naapertorlugu malersuinermut aamma angallannermut inatsimmi §§ 9-11-mik unioqquitsinermut atatillugu pinerluttoqarneranik paasiniaanermut ilanngussamik, motorinik ingerlatilinnik sunilluunniit ingerlatsisinnaanermik akuersissummik arsaagaanermik imaluunniit allaffissornikkut atorunnaarsitsinermik, kiisalu pissutsit pineqartup timmisartumik aqutsisinnaanermut piukkunnassusiata nalilerneqarnissaanut pingaaruteqarsinnaasunik allanik.

Imm. 2. Imm. 1 malillugu paasissutissanik ingerlatitseqqinneq taamaallaat pisinnaavoq paasissutissani pineqartup akuersineratigut. § 16, imm. 2 aamma 3 taamatuttaaq atuutissapput.

§ 29. Kriminalregisterimit taamaallaat paasissutissat immikkullarissut ataasiakkaat politiinit pisortanut ingerlateqqinneqarsinnaapput ingerlatitseqqinneq namminersortut pisortalluunniit soqutigisaat pineqarpata, aamma isertuussinermut peqqutit soqutigisat pineqartunit ersarissumik pingaaruteqarneruppata, taakku ataanni paasissutissanut tunngassuteqartoq eqqarsaatigalugu, imaluunniit ingerlatitseqqinneq pisortat suliamik ingerlatsinerannut pingaaruteqarpat imaluunniit pisortat aalajangernissaannut pisariaqartinneqarpat.

§ 30. Kriminalregisterimit takussutissianik tamakkiisunik pissarsiniarluni qinnuteqaatit aamma pillagaasimanginnermut pillagaasimanermulluunniit uppersaammik pissarsiniarnerit politiinit, unnerluussisussaataasunit, Udlændingestyrelsemis, auditorkorpsimit, Justitsministeriamit, Direktoratet for Kriminalforsorgenimit, Kalaallit Nunaanni Pinerluttunik Isumaginnittoqarfimmit, aamma pinerluttunik isumaginnittoqarfiup isertitsiviinit allakkatigut, imaluunniit elektroniskimik qarasaasiatigut iserfigineqarsinnaasoq atorlugu saqqummiunneqassapput. Oqartussa qarfinnit allanit qinnuteqaatit allakkatigut saqqummiunneqassapput.

Imm. 2. Qinnuteqaammi takuneqarsinnaassaaq paasissutissat siunertanut sunut atorneqassanersut.

§ 31. Takussutissiani tamakkiisuni, pillagaasimanginnermut pillagaasimanermulluunniit uppersaatini aamma paasissutissani, kapitali una malillugu ingerlateqqinneqartuni, erseqqissumik takuneqarsinnaassaaq paasissutissat oqartussa qarfinnit pineqartunit isertuussassatut sularineqassasut.

§ 32. Kriminalregisterimi paasissutissaatigineqartut kisitsisitigut paasissutissanut maskiinakkut anillatsinneqartunut tunngaviussapput.

Kapitali 7

Paasissutissanik immikkut ittunik ingerlatitseqqinneq

§ 33. Rigspolitiit qinnuteqarfigineqarneq malillugu inunnik, suliassaminik sularinninnissaminnut atatillugu toqqaannartumik meeqqanik 15-it inorlugit ukiulinnik attaveqartussamik, atorfinitsitsinermut imaluunniit sulititsinermut atugassamik, pinerluttoqarsimaneranik misissuinerme immikkoortumit paasissutissanik aalangiinnermut

immikkoortumi ilanngunneqartunik imaluunniit ilanngunneqarsimasunik, aamma pinerluttulerinermi inatsimmi §§ 79-imik unioqutitsinermut, aamma 85-imik, kiisalu § 74-imik, § 80-imik aamma § 84, imm. 1-imik unioqutitsinermut tunngasumik paasissutissanik ingerlatitseqqissinnaapput, pisoq meeqqamut 15-it inorlugit ukiulimmut iliuuserineqarsimappat.

Imm. 2. Rigspolitiit aammattaaq paasissutissanik imm. 1-mi taaneqartunik ingerlatitseqqissinnaapput, inunnik, suliassaminnik suliarinninnissaminnut atatillugu meeqqat 15-it inorlugit ukiullit akornanniittussanut, taamalu meeqqanik taakkuninnga toqqaannartumik attaveqarnissamut periarfissaqartussanut atorfinitsitsinermut imaluunniit sulisitsinermut atugassamik.

Imm. 3. Rigspolitiit aammattaaq paasissutissanik imm. 1-mi taaneqartunik ingerlatitseqqissinnaapput, imm. 1-imi aamma 2-mi inuit taaneqartut aappaannut, inooqataannut, meeqqanut najugaqataannut aamma allanut tunngasunik, taakku imm. 1-imi imaluunniit 2-mi taaneqartut atorfinitsitsinermut imaluunniit sulisitsinermut atatillugu meeqqanik 15-it inorlugit ukiulinnik toqqaannartumik attaveqarnissaminnut periarfissaqarpata.

Imm. 4. Imm. 1-3 malillugu paasissutissanik ingerlatitseqqinneq taamaallaat pisinnaavoq paasissutissani pineqartup akuersineratigut. § 16, imm. 2 aamma 3 taamatuttaaq atuutissapput.

Imm. 5. Rigspolitiit imm. 1-3 malillugu paasissutissanik ingerlatitseqqinnerannut atatillugu erseqqilluinnartumik takuneqarsinnaassaaq tunngavissaqanngitsumik paasissutissanik ingerlatitseqqinneq pineqaatissiinermik kinguneqarsinnaasoq.

Imm. 6. Imm. 1-3 malillugu paasissutissanik ingerlatitseqqinnissamik qinnuteqaammik saqqumiussinermi, Kriminalregisterimit paasissutissanik immikkut ittunik pissarsiniarnermi immersugassaq Rigspolitiinit suliarineqarsimasoq atorneqassaaq.

Imm. 7. Rigspolitiinut allakkatigut saaffiginninnikkut inuk qinnuviginnittoq pineqartoq pillugu nalunaarfigineqarsinnaavoq imm. 1-3 malillugit paasissutissat ingerlateqqinneqarsimasut pillugit.

Kapitali 8

Isumannaallisaatit

§ 34. Kalaallit Nunaanni pisortat ingerlatsiviini suliarinnittarnermi malittarisassatut aalajangersakkat suliarinninnermi isumannaatsuutsinissamut inunnut paasissutissanik suliarinnittarnek pillugu inatsimmi kapitali 11, aamma nalunaarummi inuit pillugit paasissutissat illersorneqarnissaat pillugit iliuusissatut aalajangersakkat atuupput.

Kapitali 9

Atuutilersitsineq

§ 35. Nalunaarut atuutilerpoq ulloq 1. decembari 2016.

Imm. 2. Nalunaarummi malittarisassat, taassumunngalu ilanngussatut ilaatinneqartut ilanngullugit aammattaaq pinerluttulerinermi suliani paasissutissanut siusinnerusukkut nalunaarummi oqaasertaliussatut atuuttumi, taassumunngalu ilanngussatut ilaatinneqartumi taaneqartunut tunngasut pinerluttulerinermi inatsimmik unioqutitsinerit atuutissapput.

Justitsministeriet, ulloq 29. november 2016

SØREN PAPE POULSEN

/ Anders Aagaard